

四庫全書

史部

欽定四庫全書

史部

浙江通志卷一百一

詳校官給事中臣戴璐

檢討臣德生覆勘

總校官編修臣倉聖脉

校對官中書臣溫汝适

謄錄監生臣席大賓

欽定四庫全書

浙江通志卷一百

風俗

台州府

臨海縣

附郭

晉書地理志火耕水耨漁獵山樵飲食頗給民無千金之家

陳公輔台州風俗記台介東南之陬里無貴游百姓

樂業但食魚稻習樵獵而不識官府之嚴

洪适通判廳記壤僻民愿牒訴簡少輸調有常

赤城志台士皆激昂奮厲以禮義廉恥為先以行檢
名節為貴民皆質直愿慤以耕鑿芻蕘為生以安
土重遷為業非貧困無聊不肯自墮於商販胥徒
之役

赤城志州負山瀕海沃土少而瘠地多民生其間轉
側以謀衣食寸壤以上未有菜而不耕者也鄉戶

不足於財而有餘於行其真樸敦厚里黨多化焉
胡榮文廟記地應上台士秀而文質均

王士琦平賦碑記浙以東瀕海諸郡利饒魚鹽商舶
輳集民逐什一而擁厚貲獨台途錯孔道無末業
而鮮蓋藏

金賁亭台學源流序台古荒域歷漢及吳二三君子
始以幽操正行有聞當世晉唐之際節概文章之
士亦班班見典籍

吳時來志學書院記成弘間人才最盛其樹立皆足
表表於世其登科者歲至七八人與浙以東相雄
長

王士昌平圖記土瘠人窳然其先多賢俗尚忠孝喜
廉讓無豪暴欺詐故浙中稱樂郊

臨海縣志臨海山川峭厲人皆秉性堅貞百姓務本
力農無興販境外素封家惟積粟菽柏麻以資饒
足仕者侃侃立朝以言利為恥

黃巖縣

晉書地理志氣躁性輕好佛信鬼

王士琦明倫堂記扶輿磅礴氣日益久士日益奮家
詩書而戶絃誦

黃巖縣志其民秀而敏人人殊異皆以文藝相應有

鄒魯風

天台縣

車若水平價倉記天台邑治去江百里米舶鮮至而

為閩甌入京孔道往來扉屨增饕其間市井貴羅
扇及村落數日辛勤之傭不營一飽

孟夢恂縣學記天台為邑山蘊水融民淳物茂前哲
之典型具存文華之穎發踵進

赤城新志天台以山水擅名域內隋梁間多棲仙釋
故有洞天福地之說及晉唐來俗尚詩書人敦孝
弟而人文漸蒸起矣

天台縣志土瘠民貧室廬儉素人不習工巧匠作器

以多取給他處魚鹽山海之利皆異郡專之惟坐
肆售貨覓什一之利朝貴還城不乘車馬深山窮
谷穉子皆知讀書牧豎樵夫亦識字守分者多抗
法者少

仙居縣

赤城新志仙居枕山趾海雖若蠶叢其風俗與首邑
不少異

仙居縣志山川秀美土風樸茂賢士大夫多光明俊

偉能世其業即編戶之民類不能具什一以求尺
寸之贏於四方

寧海縣

吳子良縣學記井聚僻寂迫山海民力耕釣安賦輸
產慳食嗇

陸瑜縣學記名儒輩出甲於他邑

薛三才林公祠碑記寧邑僻居海隅其民執固勇敢
士多穎質

胡獻來胡侯德政碑記
緱城故忠節禮義之鄉素稱

易治

金學賢葛氏族譜序其大家多優裕和雅喜學而好文其小民力業寡求罕爭而鮮訟其俗最為得文質之中

寧海縣志男耕女織有勤儉風力本右文無浮靡習故家尚清議士矜名節婚嫁擇先門第慶弔罔敢失禮營室必作家廟燕享以時婦女不出街市此

其俗之美者

太平縣

鮑復泰三台采風詩序風俗敦龐習尚簡質

台州府志連山濱海舟楫不通其地止農漁不習上國之奢華故其民尤樸茂近古

太平縣志明初地曠人稀土田不過畝一金是時法尚嚴密縉紳士庶罔敢侈肆衣不過細布土縑仕非達官不得輒用紵絲女子非受封不得長衫束

帶居室無廳事高廣惟式至宣德正統法網漸疎
奢侈競起成化弘治間役輕省費生理滋殖田或
畝十金屋有廳事正德以來貧耗而無高貲鮮所
借貸民由是困

台州府志男子年十六以上始冠亦有及婚而冠
者此禮惟世族間一行之女臨嫁前數日行笄禮
受母訓戒議婚必憑媒氏納采請期奠雁諸禮悉
如古制惟親迎未行嫁娶日各擇其族之賢者相
與迎送以成姻禮初喪含殮畢即成服開喪姻戚
赴弔貧富稱家有無不用鼓樂頗為近禮葬用石
槨親友執紼哀送不事梵音仙響祭祀大家各有
宗祠細民從寢室設龕四時之祭元旦清明端午

中元重九冬至除夕各以時物為薦子姓享餽餘墓祭或用羊豕或用牲醴各隨其祭田之厚薄而頒胙亦以是為差

台州府志元旦長幼夙興拜天地宗祖因相慶賀元宵張燈五日俗以十四日為重室內皆燃燈婦女行百步以去病清明採菁草雜米麩為餌謂之寒食家無貧富必攜酒祭墓且插柳於門或簪之謂之驅香九娘蓋指螢蟲云四月八日浮屠於是日浴佛人家取烏桐葉染飯作青色以相饋謂之送烏飯立夏拭麩為薄餅裹肉菹啖之謂之醉夏六月六日各曬衣與書籍老者食雞粥謂時極陰以補陽云中秋玩月酌酒俗以十六日為重猶元宵之重十四也臘月二十四日掃屋塵謂之除殘星夜祀竈謂送神上天除夕先期備牲醴祭賽天地是夕祭祖飲餽餘分歲或燃燈達旦又謂守歲

云

金華府

金華縣

附郭

王栢跋八行家傳習尚忠厚公論坦明

宋濂呂東萊祠堂記俗勤耕織士知所學

王一寧送張宗原赴金華序其民淳其訟簡其豐裕
雖不及於浙右而易理過之

章懋縣志序男勤生業女事婦工不出閨門鮮鑽穴

踰牆之行務營田宅無聲色狗馬之好慶生弔死
禮尚往來嫁女婚男擇先門第

金華府志民樸而勤勇決而尚氣族居巖谷不輕去
其土以耕種為生不習工商其富人雅好義喜延
儒碩士愛誦讀厯產名賢魏科執政踵相接也登
仕者多尚風節

蘭谿縣

陳子巒縣學記蘭谿山川朗爽秀拔故其人往往有

穆叔所謂三不朽者

蘭谿縣志蘭谿風俗古今凡幾變宋南遷中原文物
之漸漬諸賢禮樂之講明蔚然為文獻之邦氣習
醇厚此其俗之可取者也但居市者多誇詐處田
里者或粗鄙或輕諾而致訟或論財而鬻女此其
俗之未盡善者也

東陽縣

成化東陽縣志士愛讀書大家子弟無不從師受學

有志者習舉業遲鈍者亦求通章句知禮義之方
農知服業父子力作以耕植為事故衣食恒足婦
人女子深處閨門雖親戚鄰里亦不少接專以紡
織為事日用飲食服飾器具一以簡素為尚不事
文飾其聲色遊燕玩賞花石之樂舉不崇尚有商
人尚質之風

隆慶東陽縣志 俗居巖谷不輕去其鄉以耕種為生
不習工商富人雅好義舉大姓重門第宗祀譜士

人能談性命登仕者多尚風節

義烏縣

隋書地理志風俗澄清道教隆洽

黃中輔忠孝堂記人物風流孝行卓異

劉濬登科題名記俗尚儒雅甲於他邑

萬歷義烏縣志男子服耕稼婦女勤織紡商賈鬻魚
鹽工習器械以利民用無淫巧奇袤之物

永康縣

洪垣縣治廳壁記永康舊俗重儉嗇好強戾

張元楨永康縣譙樓記俗故謹厚士民樂業

永康縣志宋淳熙間先儒晦菴朱子與東萊龍川二

先生設講席於五峰洞天永之人士其得沾先賢

風教者有由然矣明初承舊俗為士者多樂田野

及成化弘治間文采蔚然倍於往昔正靖隆萬之

際不惟掄科擢第比肩林立而議論政事亦往往

可觀

永康縣志永之溪漂悍而衝激易涸而不沈蓄其土
重實而剛燥寒淡而磽瘠民生其間遂有勇悍夸
詐之習民鮮淫巧工多粗劣持斧鑿者不及雕鏤
操機杼者不及錦綺秉針線者不及組繡攻澤飾
者不及文章而縣治四境之俗亦復不同東邊東
陽南邊括蒼西邊武義北邊義烏東陽之俗文其
弊也飾括蒼之俗武其弊也悍武義之俗質其弊
也野義烏之俗智其弊也黠

武義縣

呂祖謙徐公墓記負山之民氣俗敦慤樂田畝而畏官府遨嬉侈麗之習獨不入其鄉

許謙送遂公平赴武義教序地狹而土肥其民富庶而風俗勁急舊為東萊講業之地流風餘韻猶有存者士大夫能道詩書通今古

楊本儒學記其民剛悍不相下故其俗獷猛號難治武義縣志男勤生業女工紡織家尚儉樸而安質素

無狗馬蹋踰之戲鮮綺繡戴勝之觀無論村落僻
塢即城市之民無不笠糾饌黍稼穡是事

浦江縣

陳亮縣志序浦江山邑非賓客商賈之所奔轅民生
其間者往往樸茂質實以不欠租賦相尚以不厯
公庭為常長吏至則相與安樂其俗而已

柳貫明倫堂記介然下邑無名山大澤以發舒其奇
無珍寶絕產以阜通其利民業稼外以儉嗇自全

其生

戴良浦陽人物記後序人物之生不一而足以忠孝
貞節著者有之以政事文學顯者有之

宋濂深溪王氏義門碑浦陽婺山邑樸美淳質力農
務本恥於華言偽行而以士自命古者禮義之俗
殆不是過

湯溪縣

胡森縣學記其俗樸而固其民勞以思襁褓秉耒而

無外慕

胡森陳侯弭盜却金記湯樸俗也勤而嗇樹本而滋
野處而不暱其室家保聚椎結之風蔑如也

洪啓睿縣志序其土确其俗龐

湯溪縣志湯溪割四縣邊隅之地為邑故習俗各隨
其方如遂昌多强悍蘭溪多澆詐金華多儉嗇龍
游多鬪訟湯溪則兼而有之然士好禮讓農務力
田不喜牽車服賈以走四方且里不朝歌巷不夜

游依然有古之遺

湯溪縣志家絃戶誦人知自奮登賢書者代不乏人

金華府志冠禮民間鮮行惟士大夫家間行之昏禮士大夫家鮮親迎始至設香燭令師巫咒而撒沙童子羅揖誦詩及夜以紅綵繫而牽之行合卺禮三日廟見後盛服出拜姑嬋次及家衆喪禮沐浴含襲及殮彷彿文公家禮朝夕哭奠每以七日一舉祭禮至日則宗族親戚相率持香燭哭拜謂之炷香又率用僧道作佛事謂之追薦葬埋富者多用石槨其次用灰隔祭禮士大夫家用四時民間多用俗節近又多會其族人立大小宗祠因以歲首聚拜祠內謂之合族會

金華府志元旦舉家風興盛服焚香拜天及懸祖先遺像或祠堂神主率長幼拜之然後尊長輩以

次交拜詣族黨親友之門投刺相賀名曰賀歲立春前一日官率僚屬迎春於東郊春日官祀太歲行鞭春禮碎土牛家設酒餚以祭土神謂之作春福正月十五日夜各家懸燈於門首街衢接竹為棚繫燈其上笙歌鼓樂喧闐徹旦社日四鄉各有社祭以祀土穀之神清明日人家門戶插柳枝少長行賞郊外名曰踏青前後十餘日祭掃先墳四月初八釋迦佛生日為浴佛節俗染烏飯競相饋遺端陽日龍舟競渡男女聞視親族相款民費不貲是日取菰葉裹粘米為角黍相餽置菖蒲雄黃於酒飲之婦女佩符艾或以繭作虎小兒絲絢繫臂綴繡符於衣帶謂可消災採藥合藥者俱以是日為最効七夕女子夜間陳瓜果祭賽乞巧中元素食祀先僧舍作盂蘭盆會或放水燈爛若列星八月十五日家各置酒燕集祭祠廟九日佩萸泛菊蒸米作五色糕士人或具酒棹遊山為登高會

冬至各設酒餼以祀其先十二月二十四日夜祀
竈品用糖糕人家各拂塵換桃符門神年終親戚
互為歲餽交錯於道除日灑掃堂室懸祖先像燭
柴於庭燃紙炮以代爆竹相應答響至元宵不絕
終夜圍爐集少長歡飲
羣坐不寢名曰守歲

永康縣志元夕張燈街市城中各以會為大燭導
以鼓樂昇置神廟最大者或用蠟四五百觔此一
郡所無也清明男女上塚祭掃掛紙錢於上謂之
標青十二月二十五日謂之年頭禁是日不出財
以赤豆和米煮粥曰蠶
花粥食之利養蠶也

東陽縣志社日農家用青麵作果橘葉夾之名曰
社果以獻其先乃食夏至凡治田者不論多少必
具酒肉祭土穀之神束草立標插諸田間就而祭
之謂祭田婆六月六日農家復祀穀神謂之六六

福重陽提壺挈榼登高攬勝雨
則以十二補之謂之賽重陽

義烏縣志三月上已先十餘日沿
溪民泛龍舟至是日止俗呼競渡

蘭谿縣志七月二十四日邑有東嶽廟先期廟
祝散會號至期童男女往廟銷號謂之孩童會

衢州府

西安縣 附郭

漢書地理志地邊楚習於戰鬪

李華刺史廳壁記俗尚文學有古遺風

毛升超覽堂記其君子多亢言而厲行易知而難狎

弘治衢州府志風土樸野民俗醇厚士力學操觚安
貧砥行無越禮犯分告訐狡獪之事尤多師範經
師人師後先輩出故後進人品學問皆有原本極
重試事以低昂為榮辱各樹壇坫爭自濯磨顧惜
朋儔矜尚意氣農能茹苦食貧不輕改業

西安縣志士修禮義俗尚敦樸自漢以來浹洽政化
宋南渡後士風益競至今敦行古道雅尚禮文君
子重廉恥惜名節小民畏刑憲寡詞訟居市者文

而浮處野者質而鄙

西安縣志穀賤民貧恒產所入不足以供賦稅而賈人皆重利致富於是人多馳騫奔走競習為商商日益衆吉凶婚嫁一切隨其豐儉故宕佚簡易無頭會拮据之煩

龍游縣

程俱保安院記其風悍以果其君子耿耿好氣而敏於事

衢州圖經其俗嗇其民尚氣而誇功

徐伯彪文廟記儒風甲於一郡

商輅縣學記居室富庶人物奇偉

余杰縣城記民庶饒喜商賈士則緝學綴文取仕進
萬廷謙龍游縣志序民靜而安俗樸而儉閭閻不識
胥史幾於標枝野鹿之風

萬歷龍游縣志苦塊之艱不御羞饌數世之忌弗忍
舉輩宗黨十世亦周恩意姻戚百年尚相贈遺其

叔世之古道哉

龍游縣志農勤於力田治無隙地工不務淫巧皆能
自食其力風俗敦厚婦人少出戶庭澌水以南務
耕北尚行商士力學操觚發一第不為炫耀及謝
政還與往時同舍生及布衣交出游如常

龍游縣志賈挾貲以出守為恒業即秦晉滇蜀萬里
視若比舍故俗有遍地龍游之語

常山縣

楊韓科貢題名記常山衢之名邑自昔號為文獻鍾
山川清淑之氣賢才後先相望

常山縣志地狹民稠人尚勤儉事醫賈趨利尚氣信
鬼神好淫祀宋朱晦菴呂東萊張南軒講學於此
故學者知向方民無終訟婦女不踰閨閭昏嫁尚
簡樸

常山縣志其產多聰明俊傑負氣尚志知廉恥謹修
飾

江山縣

張斗縣令題名記民樸魯而鯁直

正德江山縣志山峻水駛故士多志尚講究理學地

僻土腴故居民饒裕俗尚奢靡

徐文溥縣志序士知向方有古遺風

江山縣志江邑沃壤民殷富人肩摩廬舍鱗次商賈

輻輳

江山縣志士尚氣節厲德行民務稼穡而健於訟向

時人務本業野無曠土邇來清湖為閩越孔道至
有釋耒而逐負擔者

開化縣

程遂縣學記民生山谷無繁華盛麗之見無聲色臭
味之娛男子耕稼婦人蠶織早作暮息勤生安業
故其習多務本其秀民知讀書識道理愛親戚敬
賓客睦鄉里非法之事懼不敢為

胡儼歷科題名記士嗜讀書重名檢登科歷顯他邑

莫儷

邵驥三達尊記山川環秀風俗醇雅人皆樂善好儒
汪慶伯傳公祠碑記土硯瘠民鮮蓋藏

開化縣志士鍾靈秀工葩藻以凌雲民鮮出疆甘田
舍而肆志其在土著鄉民有不識縣縣民有不識
郡者

衢州府志冠禮男子年十六以上始冠父兄擇日
告廟以冠之婚禮凡品官婚娶或為子聘婦先遣
媒氏通書次遣使及媒行六禮婦至壻家主人饗
燕送者明日謁見祖禰次見舅姑行盥饋之禮舅

姑饗婦如家人儀喪禮厥明小殮明日大殮遂成服三月而葬遇柔日再虞剛日三虞三虞後卒哭遷主入家廟祭凡品官立祠堂奉高曾祖禰四世之主以四仲之月祭之又有臘日忌辰及掃墓之祭與夫歲時俗節之薦享庶人得祀其祖父母父母而時享於寢其祭與品官畧同

西安縣志元旦昧爽具衣冠禮拜天地神祇及祖先賀尊長然後謁拜宗族及過里黨親舊交相謁賀擇日上墓具酒果挂楮錢元宵街市張燈鼓樂市井家植竹木為棚懸燈當道更以紙剪走馬諸燈及為龍燈周行巷陌士民競觀是月也農家以秫米搗為糰釀酒市肉祭田祖先嗇祝有秋清明日往墓培土具牲醴挂紙錢會族人飲餽餘插柳於門四月八日家造青精飯相遺謂之烏飯端午懸蒲艾於門泛雄黃菖蒲酒食餽餽以角黍相遺以綵絲為索繫兒童項臂曰百歲索以避邪延壽

七夕小兒以五日所繫之綵索剪之泛以水送置屋上以為鵲橋之渡中元俗稱鬼節設齋素以祀其先里民集浮屠為盂蘭盆會亦有夜放河燈者中秋戶邀賓朋置酒賞月秋社報成與春社同重陽各置酒登高以秫米餠發之雜以肉果蒸為糕以會賓朋習禮之家前後省墓祭以時食冬至祀祖先於宗祠長幼咸集以次羅拜拜畢受胙其外姓不行拜賀之禮惟官師士紳行之十二月二十四日夜祀竈神謂神以是日上天啟事具糖米果茶以祀之除夕陳設祖先像易門神桃符燒火爐放爆竹骨月團圞坐飲謂之守歲

嚴州府

建德縣

附郭

方逢辰新定續志序嚴介萬山之窟土堅而隔上不
受潤下不斥鹵雨則潦霽則槁土淺而源枯其民
苦而耐其俗儉而野其戶富者畝不滿百民僅以
山蠶入帛官兵月廩率取米於鄰郡以給而百姓
日糴則取給於衢婺蘇秀之客舟

余植進士題名記瑰奇特杰之觀瀟灑清絕之氣獨
萃斯邑士氣夙醇文風寢盛方來者尚源源也

新定續志郡人物表表相望大抵尚氣節而輕功名

有子陵之風

太平御覽睦州取俗阜人和內外輯睦為義

嚴陵志山高水深人性貞介君子好禮小人勤生男
女有正性而無淫行

明一統志民貧而嗇多文學之士

宋賢條議嚴緇疏民淳事簡訟少糧完文獻則三元
及第風俗則九世同居從來易治之善地也

建德縣志建邑山多田少硲确者半耕讀之外別無

餘蓄歲或不登借糴他邦食云艱矣戶習詩書家敦仁讓嫁娶槩從其儉喪葬稱其有無

淳安縣

范鎔勤清堂記地大而民衆訟繁而賦廣

嚴陵志邑名淳安其風非無存者人物彬彬代有其人

淳安縣志土硯產薄民貧俗愿鎮之以無事則易治也

桐廬縣

方輿勝覽山嶮土硤蠶桑是務蒸茶割漆以要商賈

貿易之利

嚴陵志多居山谷地狹且瘠穀食不足仰給他縣

桐廬縣志君子多輕世而傲物小人多勤生而務本

遂安縣

嚴陵志僻居巖谷附山依水俗尚勤樸少奇袤

遂安縣志嫁尚粧資高者至破產不計卑者或勒索

聘財喪遵家禮服制如儀而崇尚熙事張燈設食
飯閣黎羽士費用不貲服飾尚儉樸近亦稍華焉

壽昌縣

嚴陵志俗號輯睦可以無事治不可以多事理

壽昌縣志邑介四山之中地狹而瘠民嗇而野舟車
不通商賈不行俗儉而易足頗惑於鬼神富豪多
以華麗相尚

分水縣

嚴陵志山多田少水淺戶磽地狹民稠木炭紙茶之
利終歲所入不足以給饔飧三分之一大率貿易
販糴仰賴他郡以為生

分水縣志人士雋良多好文雅喜誦讀重功名文武
登雋蟬聯不絕

分水縣志崇奉象教信鬼神

嚴州府志男子既長擇日而冠拜天地祖宗父母
三加請戒之禮不行久矣女子于歸始為加笄婚
必擇門第相當者以媒通之女家即以女之年庚
書帖付之為允嗣方納聘於女家臨娶先數日仍

送羹飯禮以便女家告祖娶之日不親迎盛張鼓樂離用傳席交杯諸儀有即日出拜公姑亦有三朝拜者喪大率用文公家禮惟不行斂不用布絞墓多砌磚為槨不甚用浮屠皆於旬日之內舉殯先是受親友賻弔葬畢孝子服麻經踵門謝之祭以忌日終身不廢元旦必拜墓清明日則掃墓中元則祭於家多用蔬食下元亦有墓祭皆習簡樸不尚華麗

嚴州府志元旦味爽而興設香燭拜天地祖宗男女成禮畢親友互相賀歲立春前一日縣令迎青帝上牛於東郊散春花撒春豆春米茹春餅粧露臺元宵各張燈結棚放花爆和麩圓薦先更相賀食新婦之家設醴祭床社日各鄉為牲醴祭社神以祈報畢則飲福清明插柳於門寢竈墜人簪柳葉辰墓祀祖立夏日煮夏粥亦有饋送者四月八日作烏飯端午包角黍餽節懸艾虎小兒佩壽源

道符門貼符篆飲菖蒲雄黃酒六月六日曬衣曝書七夕婦女設祭於庭穿鍼乞巧中元祭享祖先亦有僧僧作齋口法事者社日各鄉設牲醴迎社神閔苗中秋設尊壘以觀月華燕飲至夜分乃止重陽炊糴餅薦先飲茱萸酒下元展墓冬至祭祖於家廟相見稱賀如元旦禮臘月二十四夜設果送竈儺戲於街除夕懸祖父遺像奉祀饋節懸桃符祀竈骨月團圍而飲坐以守歲

建德縣志立春前一
日田家擊長秧鼓

桐廬縣志二月十二日俗傳以此日之晴雨卜衆卉之艷否名曰花朝備牲醴合祭先祖謂之春祭九月九日有作角黍以相遺者謂之重陽粽

溫州府

永嘉縣

附郭

隋書地理志少爭訟尚歌舞婦人勤於紡織有夜綰
紗而旦成布者俗謂之鷄鳴布

元和郡縣志永嘉蠶一年八熟

王十朋送葉秀才序誼理之學甲於東南筆橫渠而
口伊洛者紛如也取科第登仕籍多自此途出

王禕送顧仲明序永嘉東南名郡山川峻清偉人間
出號稱六藝文章之府

嘉靖浙江通志始東甌王信鬼故甌俗多敬鬼樂祠
甌江逸志東甌向稱沃壤名小杭州

甌江逸志溫州自夏徂秋常觀雲以候風一日之間
風稍息則雨大傾雨稍霽則風復作謂之風癡居
民海賈咸以為憂

萬厯溫州府志永嘉尚禮文重喪制婦女無故不出
戶庭恥向官府不行鬻於市

林汝詔遊雁蕩記東甌去浙遠其間地僻民醇城市

清楚人好修飾

舊浙江通志君子尚文小人習於機巧

溫州府志土薄難藝民以力勝故地不宜桑而織絀
工不產漆而器用備

永嘉縣志晉立郡城生齒日繁王右軍導以文教謝
康樂繼之乃知向方自是家務為學至宋遂稱小
鄒魯

永嘉縣志其俗剽悍其貨纖靡其士風任氣而矜節

樂清縣

王十朋待士說樂士服詩書勤職業聖賢之是師臭
味之與游謹門戶時租稅忍以省訟愼以免禍

萬厯溫州府志樂清多剛直尚節概

樂清縣志東甌限山阻海而樂尤土瘠竭力稼穡僅
支一歲地多桑柘女勤紡績瀕海之家多藉魚鹽
樂清縣志山水奇迥仕多忠亮劉靖之臣校多弘介
孤正之士民多磊落俊特之耆

平陽縣

萬厯温州府志平陽尚簡樸不事爭鬪

平陽縣志平陽瀕海禮樂文物至宋而盛時陳經正
兄弟陳殖林湜諸君子皆從游程朱之門家洙泗
而戶濂洛學有淵源名士相繼而顯至今敦尚詩
書勤於教子義塾之設殆徧閭里

平陽縣志俗淳厚尚樸素男子務耕種不事商賈女
子不尚刺繡夏績苧冬紡棉晝夜無間雖高門巨

室始亂之女垂白之嫗皆然

瑞安縣

陳傳良義學序家務為學人務省事其俗甚厚

萬歷溫州府志瑞安俗近永嘉然尚儉約

瑞安縣志恭叔篤行水心正學忠定如陳學士正定
如卓侍郎道德文章代有稱述

泰順縣

萬歷溫州府志泰順俗視平陽更質

秦順縣志秦居甌極西山勢高下大小有序無刻峭
頑怪狀水清澈可鑒而鮮奔潰故風土溫和民質
不戾

秦順縣志土瘠民貧男耕女織其俗有唐風蟋蟀之
遺民而秀者齒讓相先雖至貴不相假弦誦之聲
居然小鄒魯也

溫州府志民間久不行冠禮惟士大夫家間一行
之議婚以男女生辰互易卜筮名曰開合卜筮既
吉媒妁通好其納采曰起帖具禮儀外多致紅箋
茶果以通知女氏宗戚納幣曰言定備釵釧羊酒

之屬以白金代色繒請期曰送日納幣時有未備者此時補之昏日婦至門未下車婿揖婦者四婦乃入門交拜拜舅姑畢歸房合卺三朝廟見以女紅獻尊長以次分送姻婭有差喪大殮時親鄰皆至名曰送殮喪家多備筵席士大夫家多用鼓樂崇尚浮屠多作佛事葬日親串來視不具賻臨衢多設路祭主人受之即以餽餘餉客閱三日復祭於墓標插紙毬而歸祠祭近家禮俗節及祖考忌辰誕日獻時食於寢室或獻於家堂清明孟冬則展祭於墓終身不忍廢也温州府志元旦祀先序拜尊長畢出謁親族鄰里或留飲月朔至五日謂之節假立春日燒樟葉燃爆竹啖饌實煑茗以宜達陽氣名曰煨春端午各鄉俱操龍舟競渡祈年賽願七夕以綵縷穿針陳瓜果以乞巧臘月二十四日前掃塵淨宇迨此夕則祀竈鳴爆竹謂之交年

平陽縣志上元通衢上結行棚掛綵夜間懸各色
花燈放花砲裝鰲山廟宇尤盛近多漆龍獅子沿
門慶賀七夕作巧食以啖以巧食擲屋脊上謂雀
舍此布橋以使牛女相會是夕羣兒取瓦片敲擊
以慶其會

處州府

麗水縣

附郭

王禕少微倡和集序州在浙東最左僻其土俗簡以
質其田賦薄以寡自昔易為

陳希點勸儲倉記括蒼負山為郡土田瘠薄沂溪而

西幾三百里為邑曰龍泉其地與閩接平時小民重本力穡僅僅自足然非舟車走集之便稍遇旱澇則移粟告糴於他邦者倍費事力

崇禎處州府志躬儉嗇尚樸素

崇禎處州府志其地多山少田勤於樹藝而衣食自足安土重遷雖貧不至鬻子女但信鬼尚巫雖士大夫之家亦不免

麗水縣志俗尚儉嗇人重本業守禮奉公頗稱易治

青田縣

劉基湖山義塾記士多俊彥室常殷阜

宋濂縣學記素稱文華之邦聲猷相尚

青田縣志俗尚簡樸衣用大布飲食不貴異物貧士

帶經而鋤里巷市廛所至輒聞讀書聲

縉雲縣

崇禎處州府志自郡守李蕃興學之後家習儒業

楊億與章廷評書獄訟甚稀賦輸素辦

宋濂樹萱堂記躬服儉素弗憚勤勞

括蒼彙紀道當甌婺之衝疲於陸運拮据樹藝豐年

僅資俯仰

縉雲縣志士厲廉隅俗尚儉節庶幾太古之遺力田
敦行敬業樂羣士風閭操為十邑最

松陽縣

程愉松陽縣經界記邑號樂土閭井周聯風俗淳厚
以賦入後期為恥

松陽縣志人崇信義家置祭田地無他業一意力本
硤确之區蓄洩及時始有秋男女盡力於耕織安
土重遷儒雅以儉嗇自持

遂昌縣

古括遺芳遂昌雖山邑詩書之族後先相望其間或
以名節著或以經學聞在山澤有韜晦而閤閤有
孝義

遂昌縣志民甘儉約而勤耕讀士崇禮義而尚儒雅

古稱好訟而喜鬪今殆庶幾

遂昌縣志崇禮甘儉不尚浮屠各建家祠有古立宗
法崇祭祀之意人文彬起禮讓成俗而好氣夙習
稍衰

龍泉縣

崇禎處州府志民力耕種尚儉嗇商旅憚於遠出貿
遷不越鄰封積書教子宦業相望

龍泉縣志平居里巷絃誦相聞重本力穡僅僅自足

其士操觚較藝好學而尚文其農則火田粒食力勤而尚儉

慶元縣

崇禎處州府志地僻民樸舟楫不通市無商賈耕讀之外無餘事士守名節婦不外見敦詩書飭廉隅安土重遷寧變產輸將不忍受辱事非切已不至公庭

慶元縣志敦讓厚別號為易治近矜尚服物轉薄文

藝無一登鄉薦者

雲和縣

崇禎處州府志山多田少土瘠民貧俗儉嗇尚樸素
李鄴侯興學以後儒業文風漸盛

崇禎處州府志質實淳樸彼此相半

雲和縣志俗敦廉恥尚節概力耕勤織衣食聊足自
給惟工藝貿易悉資外販故流移僑居者十六

宣平縣

王深源通遷渡記宣慈土壤衍沃民物富庶商旅肩踵相摩屬

崇禎處州府志俗本古樸始以坑冶致患民習不淳繼乃崇儉務本漸異於舊

宣平縣志民多惑於浮屠而訟訐求勝風習猶有存者

景寧縣

崇禎處州府志山谷遐阻商賈罕集人惟力田務穡

爭訟鮮少士務禮讓自昔記之

景寧縣志頌習靡麗禮讓未興山居樸魯猶為近古

處州府志重親迎禮姻婭皆肅衣冠陪壻至門奠
雁禮甚整聘遣宴賀從儉喪禮不事觀飾不舉音
樂親朋賻贈厚意猶存歲春秋聚族合祭其祖於
家廟生辰諱日各祭於家新歲寒食祭於墓雖極
貧不
敢弛

處州府志元旦姻里交賀家折柏枝肖鳳形繫橘
柿於中俗呼百事吉懸中堂上元節市巷皆懸燈
神廟競列古銅器名畫以比賽於通衢迎春日士
女皆出觀各坊以童子粧像古人故事皆乘牛以
應土牛之令五日為角黍懸蒲艾鄉都各造龍舟
競渡士女泛舟觀游八月望日大潮至清溪門女

予着淡素衣於門外浣手徘徊江月以當禔除之意至日家為小米米調以薑糖祀其先家人共相勸食為延年之祀臘盡餽脯栗相酬酢除夕用粉蒸糕設饌為分歲飲親朋更相邀致以敦款好

聖訓

康熙九年十月初九日欽奉

上諭朕惟至治之世不專以法令為務而以教化為先其時人心醇良風俗樸厚刑措不用比屋可封長治久安茂登上理蓋法令禁於一時而教化維於可久若徒恃法令而教化不先是舍本而務末也近見風

俗日敝人心不古囂凌成習僭濫多端狙詐之術日
工獄訟之興靡已或豪富陵轢孤寒或劣紳武斷鄉
曲或惡衿出入衙署或蠹棍詐害善良荏苒之刼掠
時聞讐忿之殺傷疊見陷罹法網刑所必加誅之則
無知可憫宥之則憲典難寬念茲刑辟之日繁良由
化導之未善朕今欲法古帝王尚德緩刑化民成俗
舉凡敦孝弟以重人倫篤宗族以昭雍睦和鄉黨以
息爭訟重農桑以足衣食尚節儉以惜財用隆學校

以端士習黜異端以崇正學講法律以儆愚頑明禮讓以厚風俗務本業以定民志訓子弟以禁非為息誣告以全良善誠窩逃以免株連完錢糧以省催科聯保甲以弭盜賊解讐忿以重身命等項作何訓迪勸導及作何責成内外文武該管各官督率舉行爾部詳察典制定議具奏特諭

雍正元年二月十三日欽奉

上諭致治之要首在風化移風易俗莫先於鼓勵良善

使人人知彝倫天則之為重忠孝節義之宜敦古
帝王勞來匡直所以納民於軌物者舍是無由也
朝廷每遇覃恩詔款內必有旌表孝義貞節之條
實係鉅典邇來直省大吏往往視為具文並未廣
諮遠訪祇將有力之家囑託賂遺者漫憑郡縣監
司之申詳即為題請建坊而山村僻壤窮民耕織
之人或菽水養親天性篤孝或柏舟矢志之靡他
鄉隣嗟嘆為可欽而姓氏不傳於域邑幽光湮鬱

潛德消沈者何可勝數爾部即傳諭督撫學
政諸臣嗣後務期各屬搜羅虛公核詢據本
人鄉評實蹟題奏旌獎勿以匹夫匹婦而輕為
阻抑勿以富家巨族而濫為表揚以副朕成俗
化民實心彰善至意特諭

雍正二年二月初二日

御製

聖諭廣訓序

書曰每歲孟春道人以木鐸徇于路記曰司徒修六禮以節民性明七教以興民德此皆以敦本崇實之道為牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祗期薄海內外興仁講讓草薄從忠共成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於耕桑作息之間本末精粗公私鉅細

凡民情之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕繼承大統臨

御兆人以

聖祖之心為心以

聖祖之政為政夙夜黽勉率由舊章惟恐小民遵信奉行

久而或怠用申詔誠以示提撕謹將

上諭十六條尋繹其義推行其文共得萬言名曰

聖諭廣訓旁徵遠引往復周詳意取顯明語多直樸無非奉
先志以啟後人使羣黎百姓家喻而戶曉也願爾兵民
等仰體

聖祖正德厚生之至意勿視為條教號令之虛文共勉為
謹身節用之庶人盡除夫浮薄囂凌之陋習則風俗
淳厚家室和平在朝廷德化樂觀其成爾後嗣子孫
並受其福積家之必有餘慶其理豈或爽哉

雍正四年十月初六日欽奉

上諭

恭紀
首卷

以王國棟為浙江觀風整俗使

雍正四年十一月二十七日欽奉

上諭

恭紀
首卷

停浙江鄉會試

雍正五年三月初三日欽奉

上諭自古帝王致治誠民莫不以重農為首務書陳無逸先知稼穡之艱難詩載豳風備叙力家之力作論語云百姓足君孰與不足孟子云民事不可緩也蓋國以民為本民以食為天農事者帝王所以承天養

人久安長治之本也我國家撫綏寰宇

聖祖仁皇帝臨御六十餘年深仁厚澤休養生息戶口日
增生齒日繁而直省之內地不加廣近年以來各處
皆有收成其被水歉收者不過州縣數處耳而米價
遂覺漸貴閩廣之間頗有不敷之慮望濟於鄰省良
由地土之所產如舊而民間之食指愈多所入不足
以供所出是以米少而價昂此亦理勢之必然者也
夫米穀為養命之寶既賴之以生則當加意愛惜而

不可存輕棄之心且資之者衆尤當隨時撙節而不可縱口腹之欲每人能省一勺在我不覺其少而積少成多便可多養數人若人人如此則所積豈不更多所養豈不更衆乎養生家以食少為要訣固所以頤神養和亦所以節用惜福也況脾主於信習慣便成自然每見食少之人其精神氣體未嘗不壯此顯而可見者至於各省地土其不可以種植五穀之處則不妨種他物以取利其可以種植五穀之處則當

視之如寶勤加墾治樹藝菽粟安可舍本而逐末棄膏腴之沃壤而變為果木之場廢饗殮之恒產以倖圖贏餘之利乎至於烟葉一種於生人日用毫無裨益而種植必擇肥饒善地尤為妨農之甚者也小民較量錙銖且但顧目前而不為久遠之計故當圖利之時若令其舍多取寡棄重就輕必非其情之所願而地方官遽然繩之以法則勢有所難行轉滋紛擾惟在良有司勤勤懇懇諄切勸諭俾小民豁然醒悟

知稼穡為身命之所關非此不能生活而其他皆不足恃則羣情踴躍不待督課而皆盡力於南畝矣朕聞江南江西湖廣廣東數省有一歲再熟之稻風土如此而仍至於乏食者是地土之力有餘而播種之功不足豈非小民習於怠惰而有司之化導者有未至耶或者曰米穀太多則價賤而難於糶賣昔人有穀賤傷農之說諺語所謂熟荒者此則不必過慮假若小民勤於耕作收穫豐盈價賤而難於出糶朕必

多發官價以糴買之使重農務本之良民獲利有餘
貲也朕平生愛惜米穀每食之時雖顆粒不肯拋棄
以朕玉食萬方豈慮天庾之不給而所以如此撙節
愛惜者實出於天性自然之敬慎並不由於勉強且
以米穀乃

上天所以生養萬物者朕為天下生民主惟有敬謹寶重
仰冀

天心默佑雨暘時若歲獲有秋俾小民家有蓋藏人歌樂

土朕既為億萬生民計不敢輕忽天貺爾等紳衿百姓獨不自為一身一家計乎朝夕生養之需既受

上天之賜若果加意愛惜隨時撙節則天必頻頻賜賚長享盈寧之福若恣情縱欲暴殄天物則必上干天怒不蒙賜賚而水旱灾祲之事皆所不免其理豈或爽哉又聞江西廣西地方竟有以米穀飼養豚豕者試思穀食之與肉食孰重孰輕孰緩孰急而乃以

上天之所賜小民終歲勤苦之所獲者為養養物類之

用豈不干天和而輕民命乎朕所以惓惓訓諭者惟期天下之人專務本業以杜浮靡愛惜物力以圖久遠共體朕敬迓

天庥勤恤民隱之意則爾等家室必益至於豐饒爾等子孫必永綿其福澤思之思之毋忽朕言將此曉諭內外官民人等並通行遠鄉僻壤咸使聞知特諭

雍正六年三月初三日欽奉

上諭覽福建巡撫常賚奏稱羅源縣孝子李盛山割

肝救其母病母病愈後李盛山傷重身故請加旌表部
議以割肝乃小民輕生愚孝向無旌表之例應不准
行朕念割肝療疾事雖不經而其迫切救母之心實
難得而可憫已加恩准其旌表矣當讀韓愈之文曰
母疾則止於烹粉藥石以為事未聞毀傷肢體以為
養苟不傷於義則聖賢當先衆而為之矣又讀朱子
書曰割股固自不是若誠心為之不求人知亦庶幾
今乃有以要譽者是先儒論及此者屢矣本朝順治

年間定例割股或致傷生卧冰或致凍死恐民倣倣
不准旌表伏思我

世祖皇帝

聖祖皇帝臨御萬方立教明倫與人為善而於此例慎予
旌表者誠乃天地好生之盛心聖人覺世之要道也
視人命為至重不可以愚昧而誤戕念孝道為至弘
不可以毀傷為正理立法垂訓實有深意存焉但向
來地方有司未嘗以聖賢經常之道與國家愛養之

心明白曉諭開導編氓是以愚夫愚婦救親而捐殉夫而殞命者往往有之既有其事若不予以旌表恐無以彰其苦志而慰其幽魂所以數十年來雖定不予旌表之例而仍許其奏聞且有邀恩於常格之外者仰見

聖祖皇帝哀矜下民之

聖心固如是之周詳而委曲也孝經曰身體髮膚受之父母不敢毀傷孝之始也孟子曰事孰為大事親為大

守孰為大守身為大此皆言人子一身為父母之遺體雖一髮一指不可偶有虧損以傷父母之所貽也孔子曰父母惟其疾之憂蓋父母愛子之心無所不至倘有疾病尚以為憂設有不肖忤逆之子父母且恕而矜之其純孝之子而父母之憐愛又當如何也豈有以已身患病之故割其子之肝肉充飲饌而和湯藥其父母之心斷無有不驚憂慘惻不安之理也若因此而至於傷生又豈父母所忍聞者乎夫父母

有疾固人子所當盡心竭力之時而孝道多端實不容効命捐軀於一節孔子曰生事之以禮死葬之以禮祭之以禮是人生孺慕之誠原通百年而無間者也人子一身承先啟後負荷甚鉅若舍生殞命於倉卒之間而忘宗祀繼續之重恐非所以為孝也況人子於親本乎天性儻能盡至誠純孝之實則親病雖篤呼籲請禱力省一身之過誓願為一正人如此必能感天地動鬼神何須割肝剗股以為圖生之良劑

乎家庭之行惟在至誠至敬善體親心不必以驚世駭俗之為著奇於日用倫常之外也至若婦人從一之義醮而不改乃天下之正道而其間節婦烈婦亦有不同者烈婦以死殉夫慷慨相從於地下固為人所難能然烈婦難而節婦尤難蓋從死者取決於一時而守貞者必歷夫永久從死者致命而遂已而守貞者備嘗其艱難且烈婦之殉節捐軀其間情事亦有不同者或迫於貧窶而寡自全之計或出於憤激

而不暇為日後之思不知夫亡之後婦職之當盡者
更多上有翁姑則當奉養以代為子之道下有後嗣
則當教育以代為父之道他如修治蘋蘩經理家業
其事難以悉數安得以一死畢其責乎是以節婦之
旌表載在典章而烈婦不在定例之內者誠以烈婦
捐生與割肝刲股之愚孝其事相類假若倣倣者多
則戕生者衆為上者之所不忍也向來未曾通行曉
諭朕今特頒諭旨着地方有司廣為宣布務期僻壤

荒村家喻戶曉俾愚民咸知孝子節婦之自有常道
可行而保全生命之為正理則倫常之地皆合中庸
不負國家教養矜全之德矣倘訓諭之後仍有不愛
軀命蹈於危亡者朕亦不概加旌表以成閭閻激烈
之風長愚民輕生之習思之思之特諭

雍正六年八月二十九日欽奉

上諭

恭紀
首卷

浙江士風丕變著照舊鄉會試

雍正七年三月初四日欽奉

上諭直省各處富戶其為士民殷實者或由於祖父之積累或已身之經營操持儉約然後能致此饒裕此乃國家之良民也其為鄉紳有餘者非由於先世之遺留即已身之俸祿節制謹度始能成其家計此乃國家之良吏也是以紳衿士庶中之家道殷實者實居五福之一而為國家所愛養保護之人則爾等本身安可不思孳孳為善以永保其身家乎夫保家之道若奢侈糜費固非所以善守而慳吝刻薄亦非所

以自全周禮以鄉三物教萬民有曰孝友睦婣任卹
可知公財行惠任卹之道與孝友而並重者也蓋凡
民之情賤者忌人之貴貧者忌人之富彼窮乏之人
既遊閒破耗自困其生又皆不知已過轉懷忌於溫
飽之家若富戶復以慳吝刻薄為心腹削侵年與小
民爭利在太平盛世年穀順成之時固可相安從來
遇荒歉之時貧民肆行搶奪先衆人而受其害者皆
為富不仁之家也迨富家被害之後官法究擬必將

搶奪之貧民置之重典是富戶以斂財而傾其家貧民以貪財而喪其命豈非兩失之道大可憫惻者乎朕為此勸導各富戶等平時當以體恤貧民為念凡鄰里佃戶中之窮乏者或遇年穀歉收或值青黃不接皆宜平情通融切勿坐視其困苦而不為之援手如此則富戶濟貧民之急貧民感富戶之情居常能緩急相周有事可守望相助收求之念既忘親睦之心必篤豈非富戶保家之善道乎從來家國一理若

富戶能自保其身家貧民共知衛夫富戶一鄉如此則一鄉永靖一邑如此則一邑長寧是富戶之自保其家猶富戶之宣力於國也朕臨御以來屢經人條奏民間貧富不勻請行限田之法乃至逆賊曾靜私著謗書謂方今輕徭薄賦惟利於豪強兼并之家與貧民無涉非復行井田不能養贍百姓等語朕思此等怪謬支離之說乃理勢所萬不能行者夫天下富者一而貧者百以一人之有餘欲濟衆人之不足貧

者未必便能成立而富戶無辜已受摧殘矣此乃懷
欲窮天下之賊論有此情理乎朕既知其必不可行
若但令地方出示曉諭陽奉陰違朕實恥而不為若
以不能行之事委之各督撫以示德於貧民使之感
朕恩意而以奉行不力之故歸怨於各督撫等又朕
所不忍為者是以特頒諭旨告誡爾等富戶為富戶
者當知己之得於天者甚厚常存濟人利物之心行
救困扶危之事敦睦宗族矜恤鄉鄰下逮佃戶傭工

皆加惠養則人人感其德意即可消患於未萌況積善之家必有餘慶種福果於天地之間子孫必長享豐厚豈不美歟著各省督撫將朕此旨通行該屬之鄉紳士民人等共知之料朕赤子良民必不負朕期望之誠意也特諭

雍正七年六月初六日欽奉

上諭游惰之民自昔治天下者之所深惡若好為賭博之人又不止於游惰而已荒棄本業蕩費家資品行

日即於卑汚心術日趨於貪詐父習之則無以訓其子主習之則無以制其奴鬪毆由此而生爭訟由此而起盜賊由此而多匪類由此而聚其為人心風俗之害誠不可以悉數也大凡為不善之事者雖干犯功令猶可得微利於一時而獨至賭博則今日之所得明日未必能保若合一年數月而計之勝者與負者同歸於盡此天下之人所共知者而無如邪僻之人一入其中即迷而不悟且甘為下賤而不辭亦大

可悲矣數年以來屢次降旨嚴禁而此風尚未止息者則以製造賭具之尚有其人而有司之禁約未曾盡力也百工技巧之事可以獲利營生者何事不可為而乃違條犯法製此壞風俗惑人心之具其罪尚可言乎嘗思賭博之風所以盛行父兄為之子弟在旁見而倣之家主為之奴僕在旁見而倣之甚至婦人女子亦沈溺其中而不以為怪總因習此者多故從風而靡者衆也假若嚴行禁止使人不敢再犯則

日積月累後生子弟無從而見即無從而學此風自然止息無俟條教號令之煩矣凡地方大吏有司均有化民成俗之責而乃悠悠忽忽視為泛常安辭溺職之咎今特定本地方官員勸懲之法以清其源嗣後拏獲賭博必窮究賭具之所由來其製造賭具之家果審明確有証據出於某縣將該縣知縣照溺職例革職知府革職留任督撫司道等官各降一級留任如本地有私造賭具之家而該縣能緝拏懲治者

知縣著加二級知府著加一級督撫司道等官紀錄
二次將此勸懲之法永著為例於雍正庚戌年為始
着該督撫通行曉諭咸使聞知特諭

雍正八年十一月二十一日欽奉

上諭民間借貸一事所以通彼此之有無濟一時之緩
急意本善也乃有貪利營私之徒往往乘人匱乏勒
索重利如借貸米穀則不但加三起息竟有加五或
多至加倍者小民偶爾窘迫止顧目前及禾稼登場

終歲辛苦之所獲不能復為已有雖豐稔之歲僅足供償債之需一遇歉收之年則束手無策必致息上起息累年不能楚結且貽累於子孫而挾貲射利乘急多取者視為固然全無矜憐憫息之意貪饕為性澆薄成風此亦世道人心之患也夫緩急亦人所有周禮三物六行孝友睦婣而繼以任卹蓋儕類里黨有急則相倚任有困則相賑卹此鄉鄰風俗之美王化所先而其人以仁厚居心亦所以長享福澤於勿

替此即仰邀

天地神明賜佑休徵之根本也從來窮通富貴境遇不常
幸而富貴有餘是

天之待我獨厚則當思濟人利物恤災扶困以廣行善事
仰荅

天恩若以天之厚我者特為剝削貧人之具不獨

上天覽臨必加譴責即返之於心亦忍為之乎凡屬貪鄙
之人利令智昏以為如此可以致富獨不思貧富有

一定之數善惡有不爽之報假令為富不仁者皆得
擁厚資以長子孫而樂善好施者必致匱乏終身矣
自古迄今有此天理乎嘗見不義之財得之若易乃
享受未久或耗於意外之灾患或敗於不肖之後人
是知刻薄之行損人適以自損仁厚之風利人還以
自利也此種盤筭惡薄之俗若不曉諭化導遽以官
法繩之恐轉開其借貸之路非所以為便於窮民故
特將天道好還循環往復之道委曲詳明覺悟貪夫

薄夫而啟其良心杜其敝俗凡有借貸銀錢米穀者
加一加二起息尚屬情理可行若太多則誠為富不
仁矣着該地方有司將天理人心時時訓諭所屬之
人以化其殘忍刻薄之習倘勸導既久如下愚頑惡
之性不移尚有為富不仁重利盤放者確訪一二人
加以懲治以儆其餘如此庶惡習可以轉移貪風可
以止息也如有無藉棍徒因朕此勸導之訓諭或借
端圖賴或生事強借以擾害良善溫飽人家者尤當

加以重懲不可寬貸但全賴地方有司奉行勸導之
公當勤誠也特諭

雍正十三年十一月初二日欽奉

上諭朕聞外省百姓有生計稍裕之家每遇喪葬之事
多務虛文侈靡過費其甚者至於招集親朋鄰族開
筵劇飲謂之鬧喪且有於停喪處所連日演戲而舉
殯之時又復在途扮演雜劇戲具者從來事親之道
生事死葬皆必以禮得為而不為與不得為而為之

者均為非孝是知各循其分乃能各盡其孝而初不在以奢靡相尚也況當哀痛迫切之時而顧聚集親朋飲酒演劇相習成風恬不知怪非惟於理不合抑亦於情何忍此甚有關於風俗人心不可不嚴行禁止着各省督撫等通行明切曉諭嗣後民間遇有喪葬之事不許仍習陋風聚飲演戲以及扮演雜劇等類違者按律究處務在實力奉行毋得姑為寬縱特諭

雍正十三年十一月初十日欽奉

上諭朕聞吉凶異道不得相干故娶在三年之外而聘在三年之內者春秋猶以為非禮記稱大功之末可以冠子可以嫁子父小功之末可以娶婦已雖小功既卒哭可以冠娶妻三年之喪創深痛鉅苟有人心者必宜於此焉變矣乃愚民不知禮教起於皂隸編氓之家有慮服喪之後不得嫁娶乘父母疾篤及殯殮未終而成婚者其後商賈中家多有之士大夫亦

間為之而八旗效之朕實憫焉自今伊始自齒朝之士下逮門內有生監者三年之喪未終喪不得嫁娶違者奪爵褫服其極貧卑隸編氓父母臥疾呻吟床褥必賴子婦以供薪水治饗殮者聽其迎娶盥饋俟疾愈喪畢而後成婚古者禮不下庶人其斯之類歟曾子問親迎女在途而壻之父母死女改服布深衣縞總以趨喪亦此義也其商賈中家不必以士大夫禮繩之然人性皆善朕知其必有觀感興起而不忍

自同於氓隸者矣特諭

雍正十三年十一月二十三日欽奉

上諭民間惡習無過於博戲有或陷溺於其中則子弟欺其父兄奴僕背其家主逃亡盜賊之源鮮不由此又有市井奸宄十五為羣聚黨鬪狠為患於鄉閭或強爭市肆或凌挾富人朝罹官法夕復逞兇其惡不減於劫盜至耕牛為農事之本民賴以生故惟

郊壇

宗廟

社稷

獄瀆之重乃用太牢而愚民妄肆屠宰價賤於羊豕悖
莫甚焉是以

皇考蒞政之初即為大禁嚴飭百吏訪緝奸宄造賭具者
有刑屠耕牛者有罰執法不移由是鬪狠酖博之莠
民屏息而不敢出內則五城衢巷市竊之賊日稀外
則商旅恬安宵行夜宿少逢剽盜田疇益治井里宴

眠摩以歲月乃克致此朕承百度肅清之後故庶政
皆從寬大欲中外吏民蒸然向化遷善遠罪而不自
知然所宥者災沴所恤者善良非謂怙終不悛者舉
可縱釋也近聞奸民倡為流言以惑衆志詭云步軍
統領緝獲賭博已經奏聞朕置而不問又屠牛之禁
亦開昔周公立造言之刑重罷民之罰謂非此不足
以定民志而成化道也勅下步軍統領暨五城御史
密訪嚴緝造為此言者以正典刑各直省州縣有不

能治其境內犯此三禁者該督撫即時叅究其或失察朕亦不能為大吏寬昔

皇考多方鼓舞故告發賭博隸民加賞有司議叙而奉行失宜間或有生事自以為功者自今以往其各實心查禁若不能禁賭及造賭具者必以不職罪之打降及屠牛亦然惡萌復生將墮

皇考已成之治化朕滋懼焉爾諸臣其共凜之特諭欽此

謹按浙土風俗各郡屬邑雖有不同而觀感興起
喁喁嚮化之心則無不同也百年以來伏荷

欽定四庫全書

卷一百

聖訓屢頒諄切教誨恩威並濟化導多方不啻面命而耳提家喻而戶曉由是十一郡之民莫不感恩戴

德近樸還淳以成一道同風之治雍正五年欽奉上諭令和碩怡親王大學士張廷玉等傳諭各省大吏

將歷年所奉諭旨凡切於民生日用者即敬謹刊刻通行頒示所屬

聖訓各地方令百姓抄錄記載俾僻邑遠鄉咸聞

聖主教養萬方之至意隨經欽遵刊刻頒行尚恐小民或有未經抄錄或久而記載偶遺者茲特恭紀於

風俗門內以垂訓萬世云

浙江通志卷一百

欽定四庫全書

浙江通志卷一百一

物產一

神禹敷土首述職貢凡鉛松怪石菌簍菁茅之屬
罔弗具載是豈勤於小物哉蓋欲周知品彙俾滋
培而長養也浙為禹會之邦沃壤數千里瀕江距
海水陸珍錯之物靡所不有識其名而并詳所自
出辨厥土宜以前民用亦職貢之義云爾志物產

浙江通省

舊浙江通志穀之類

粳稻糯稻梁黍稷大麥小麥蕎麥
糜麥芝麻青豆黑豆紫豆黃

豆菰豆豌豆刀豆蠶豆
羊眼豆虎斑豆龍爪豆

蔬之類

芥蘆芹薤波稜蒿
筍荳蔻莧蔥蒜蒲

苕蕨匏茄芋芡菱蘿蔔蔓菁茭白
絲瓜王瓜香瓜冬瓜熟瓜西瓜

木之類

柏松楊柳榆椿

楓柝桑烏柏冬青桂棟樸杉桐楓樟
柞櫟槲栗榕檉檉黃楊棕檀白杜楮梓

果之類

梅桃

杏榴棗柿榲桲橙柑梨榛香櫟葡萄
查枇杷甘蔗荸薺薺薺木瓜花紅梧桐子

花之類

芍藥牡丹紫薇薔薇棠棣荷荼蘼鳳仙錦帶蜀葵
海棠百合木香山茶玉簪芙蓉麗春瑞香鹿蒿水

仙山丹杜鵑石巖笑靨
兜佛見笑木槿蓼蘋

竹之類

水竹筍竹南天竹
王箬竹蚤筍竹篾

竹苦竹木竹猫竹龍鬚竹鳳尾藥之類棘刺花紫
歲前胡天

明精山黃皮枳實劉寄奴骨碎補細辛黃蘗車前

香附蒺藜葇草烏茨菰燈心草桑白皮桑寄生槐花

半夏橘紅大戟百合五味子白芨白斂鳳眼草野

菊花山茱萸雞冠子當陸馬鞭草鼠尾草狗舌草

蘆根牽牛金線草躑躅花葛茆香決明草蘆薈苧

菖蒲千金藤梭櫚子薄荷澤蘭牛藤蒼耳獨活藜

本貝母鉤藤香薷兔絲子杜仲大黃蛇牀子地骨

皮良薑瞿麥紫蘇山藥荊芥茴香瓜蒌瞿粟土木

瓜金櫻子枸杞子金銀花羽之類雞鶩鴨白頭翁
婆餅焦蠟嘴銅

續隨子石膏牛蒡子紫苑雞鶩鴨白頭翁
婆餅焦蠟嘴銅

嘴鷓鴣告天偷蒼竹雞雄鷓鴣鴉鵒雪姑黃頭畫

眉杜鵑布穀鵲鷓鴣鵲鷹鷄鵲鵲戴勝拖白練拖赤

練紺練雀鴉燕鷗鷺青鷺鴛毛之類牛羊馬驢騾
豕犬猫狸獾

鴛鴦鷓鴣鷓鴣鷓鴣鷓鴣鷓鴣鷓鴣鷓鴣鷓鴣鷓鴣

鹿兔麂麋獼猿獼猴麋野猪松鼠
栗鼠鼯鼠竹狗山羊刺蝟虎豹

鱗之類

鯢	鯉
鮎	鯽
鱖	鰱

鯪
鯪
鯪
魚工
魚規
魚宅

楊
魷
魷
魷
魷
魷
魷
魷

甲之類

龜

鯉 鯽 章 匡 烏 賊 黃 鎖 黃 鱖 黃 鰱 青 魚

曰之類

遊

蚌蛤蝦蟹魚蜆田螺辣螺烏鰱

貴之類

紆絲綾羅

蟻海蟬蟪黃甲穿山甲螳蜩

作之類

綢緞綿纓

繡金箔銀箔錫箔紙柏燭桐油棕漆

蘇扇 蓆箭弓 木屐 棕履 燈籠 油傘

[illegible]

謹按物產必志所自出舊志僅列一目是志物而

非志產矣。浙中山林川澤之產，為類實繁然，或不可

必盡見於載籍故先仍舊志總括其目列於篇首而凡分產各屬者咸按籍而備志之如左

穀
咸淳臨安志穀之品秔稌麥麻豆粟萬厯杭州

府志穀屬凡六一日稻為秔為粳二曰黍為黃為
白為黑三曰稷惟一種四曰麥為麴為秣為糲為
菴五曰菽為黃豆為白豆為赤豆為青豆為黑豆
為斑豆為褐豆為豌豆為菜豆為寒豆為
刀豆為羊眼豆六曰麻為芝麻為胡麻

秔稻粳稻 成化杭州府志秔有黃稈交白黑鬚赤
稻紅秣大黃小黃晚稻早遲芒晚遲芒金裹銀木
犀黃初稈黃鶯爪黃泰州紅銀杏白雁來青紅蓮

子花蓮子赤芒兒烏早遲芒梗有早梗羊鬚烏鬚

鐵梗馬鬚臘脂金釵光頭蘆花

萬厯杭州府志稻之名色甚衆大都

不出杭梗二種但早晚不同仁和錢塘海寧種多晚餘杭早晚半之餘縣多早

占城稻 爾雅翼今江浙間有稻粒稍細耐水旱而

成實早作飯差硬土人謂之占城稻

宋會要大中祥符五年遣

使福建取占城禾分給江淮兩浙并出種法擇民田之高者種之

謹按古稱三農謂山農澤農平地農也杭郡自錢塘以西諸山縣皆山田自仁及海皆平地田大抵早種多而晚種少早種所收薄於晚種故會城之米大半取給四方是宜廣設倉儲以防踊價職茲

土者所宜
加之意焉

黍 萬厯杭州府志黍有黃白二種山縣多種之黑

黍種之者少

麥 咸淳臨安志有大麥小麥

西湖游覽志
麥嶺宜麥

蕎麥 萬厯杭州府志蕎麥治為麵土人忌於柏樹

板上切食

蘆糴 萬厯杭州府志或稱蘆粟山縣種之

蠶豆 萬厯杭州府志豌豆俗呼蠶豆田塍蔬圃皆

種之

百尺梧桐閣集昌化伯邵王墳側顆大味鮮杭人稱王墳豆

赤豆 四民月令臘月以赤小豆煮粥杭人風俗也

綠豆 萬歷杭州府志杭人製為粉最滑膩水浸出

芽可為菜食夏月能解暑

穀譜綠以色名鮮者為明綠暗者為油綠早種

為摘綠遲種為拔綠杭人喜食豆芽即此

扁豆 成化杭州府志有黑白二色白者名白扁豆

青豆 仁和縣志老則炒食嫩者為烘豆稱沙田豆

黑豆 杭州府志麤者用何首烏煮食能澤鬚髮細

者魯豆生於野細而扁者零烏豆俗名馬料豆可

肥馬

菜 武林紀事杭城東園人家四時種菜販賣遠至
臨平長安俱船載而去

黃芽菜 咸淳臨安志冬間取巨菜覆以草積久而

去其腐葉黃白纖瑩

萬歷杭州府志矮黃菜味美
冠諸菜杭人訛為黃雅戒菴

漫筆杭州呼黃
矮菜為花交菜

油菜 萬歷杭州府志子可作油故名將花時取其

心食最美心去則其葉叢生花更多子更繁為利
倍之

臺心菜 咸淳臨安志此種春間最盛

芥菜 咸淳臨安志紫而辣者難得

杭州府志芥菜有紫白青油數

種紫之味最辛杭人搗其子以醋和之用拌粉食名曰芥辣

生菜 萬厯杭州府志以油醬和醋拌之可生食

莧菜 本草綱目有赤白紫三種又有野灰二種灰

莧之有紅心者不可食

韋驥紅心莧詩色若棗文雉圖如挿繡幢春葩應有

並新卉
合無雙

白菜 萬歷杭州府志杭人呼長梗白冬月之菜惟

此宜久藏

楊萬里食白菜詩新春雲子滑流匙更嚼冰蔬與雪蘆靈隱山前水晶菜近來

種子闕

西注初食

白菜因名以晶菜

南瓜 農書浙中一種陰瓜宜陰地種之秋熟色黃

如金皮膚稍厚可藏至春食之如新即南瓜也

蘿蔔 成化杭州府志大者出錢塘方家峪等山青

頭蘿蔔俗名為蘇州兒紅蘿蔔出仁和郊外

萬歷杭州

府志黃者名湖

蘿蔔出仁和

山藥 咸淳臨安志形如手掌者名佛手山藥

茭白 農桑譜茭白二種城東田多種之

錢惟善食茭白詩西

風吹雨飽秋菰卸却青衣見玉霄客裏嘗新成一笑不圖今日見西湖

芋 杭州府志岸芋也有白有紫葉似蹲鴟

本草綱目錢塘

最多味發不可食種芋三年不采則成枳別有野芋名老芋形葉相似根不可食

茄 草木子一名落蘇土人於花時採葉布路間令

踐之則子繁謂之嫁茄

咸淳臨安志有一種圓白瑩嫩者名為水茄

韭 萬厯杭州府志郡城人最貴其初出時數十莖

以十餘錢易之

薑 明一統志臨平出薑

萬厯杭州府志仁和蘇家圩多種之東坡雜

記余昔監郡錢塘有僧號聰藥王年八十餘頗如渥丹自言服生薑四十年取薑乳蒸餅或作飯和

九食之

蔥 咸淳臨安志蔥出板橋

萬厯杭州府志蔥有一種夏間莖端生數芽者

名五爪蔥

蒿筍 咸淳臨安志其菜名蒿筍食取其根名蒿筍

甘露子 咸淳臨安志三四節連生如貫珠

筍 舊浙江通志春筍一名圓筍錢塘古蕩法華山

并餘杭出茅筍茅竹所生邊筍夏月從土中掘得

之冬筍俗名潭筍杭四時不乏味特甲於諸蔬

詩注臨安人食筍

自十月至四月

哺雞筍 咸淳臨安志出稍早最肥和靖詩烟崖早

筍肥是也

苦筍 咸淳臨安志端午前杭俗多以充饋遺以其

性涼也

周紫芝劉主簿許餉苦筍詩未肯煩君便指因且看分筍不論觔此君自是盤中虎空

想斑斑箸下人注杭人重苦筍呼為嚇飯虎

紫桂筍

筍譜錢塘多紫桂筍自餘斑狸細縹不可

勝言

燕筍

筍譜錢塘多生其色紫苞當燕至時生故俗

稱燕筍

黃鶯筍

夢梁錄臨安筍有數名有黃鶯筍

白象牙

夢梁錄筍之品有曰白象牙

筍脯 餘杭縣新志筍四時不絕其煮曬為脯則曰
玉版一曰鹹筍乾而青筍為最

蓴 杭州府志出西湖初生無葉名雉尾蓴又名馬

蹄蓴葉舒長名絲蓴至秋則無人採矣

西湖志餘近出西湖

第三橋不減湘湖虞淳熙食蓴菜詩玳筵金饌綠
舟停取醉明湖酒欲醒戲採綠蓴調碧椀一時輕

薄五

侯鯖

香蓴 咸淳臨安志多生山谷松竹間東坡與參寥
智果寺得黃耳蓴詩云老楮忽生黃耳蓴是也其

大者淨白名玉葦最貴黑者名茅葦赤者名竹葦

皆下品

蔬譜土人
號為香葦

蓬 四民月令杭人於二月二日取以煎糕

木耳石耳 萬厯杭州府志木耳生桑樹者佳石耳

生山縣絕壁間

蕨粉 於潛縣志土人搗蕨根漉粉可以療饑

醃蔬 元覽臨安有酸角之醃蔬

把鮓 袖中錦臨安東華門把鮓為天下第一他處

效之終不及

香豉 名醫別錄豉出錢塘者香美而濃取中心者

佳

香椒 萬歷靈隱寺志靈山舊產香椒與川蜀無異
今無

桑 杭州府志有女桑山桑出富陽者最佳餘縣接
種者亦名富陽桑仁和縣甯公塘所產睦州青四
鄉多種此

萬年松 新城縣志南安鄉仙人石上有萬年松其

狀如柏

天目松 咸淳臨安志松有數種惟天目山者針短

而犀健枯子松三針華山松四針

素宏道天目遊
記天目山松形

如蓋高不踰數尺
一株值萬餘錢

纓絡栢 萬厯杭州府志本不甚大園亭間植之

槐 仁和縣志葉可薦茶花黃可染色根可作神燭

用

楮 仁和縣志葉茁花蕤並堪作茹造紙練布撚毳

烏柏 宣德富陽縣志桐洲中沙之民多栽烏柏樹

為業秋葉紺紅映江頗稱佳境

萬厯杭州府志葉可染阜子可取蠟

核可
竿油

椶櫚 武林舊事慈雲嶺滿山皆椶櫚

武林紀事其筍土人用蒸

煨食之
味微苦

楊柳 咸淳臨安志湖堤植柳最盛垂者長條可玩

峽川志楊園在峽石西方四五里古以其地多生

垂楊

黃楊 錢塘縣志杭人取其木堅膩作梳刻印最佳
霜木 水經注於潛縣北天目山極高峻崖嶺竦疊
山上有霜木皆是數百年樹謂之翔鳳林

青神鳳集 平泉草木記木之美者天目之青神鳳

集

咸淳臨安志
此二木名

梅 名勝志西溪多古梅二月始華香雪霏霏四面
襲人宣德富陽縣志包家墅種梅約一里許樹皆

數百年物古幹可愛其實亦佳

早梅 梅譜早梅勝直脚梅吳中春晚二月始放獨
此品於冬至前已開故得早名錢塘湖上有一種
尤早余嘗重陽日親折之有橫枝對菊開之句

紅梅 咸淳臨安志郡有紅梅閣東坡亦有紅梅詩
今土人所種有福州紅潭州紅柔枝千葉邵武紅
等種皆多結實

綠萼梅 咸淳臨安志孤山之梅唐時已著今此花

有數品綠萼千葉尤清絕也錢塘縣志西溪綠萼
結實尤佳他處莫及

鴛鴦梅 盤洲集偶得梅一枝色微紅而五出之上
復有一重皆並蒂雙實杭人呼為鴛鴦梅

桃 方輿勝覽包家山多植桃春時都人游觀最為

勝賞名勝志西湖棲霞嶺上桃花色絢如霞杭州

府志仁和臯亭山特盛

萬歷杭州府志早桃俗曰
五月桃最大者曰白桃油

桃毛桃扁桃又十
月熟者名寒桃

李 萬歷杭州府志李莫盛於西山滿覺街花時如
雪其名類有青消紫粉鶯黃數種

石榴 羣芳譜富陽榴實大者如碗咸淳臨安志唐
時孤山有石榴花見白樂天詩又靈隱舊亦多海

石榴

白果 舊浙江通志銀杏俗名佛指甲又名白果臨
安產者特長大

枇杷 咸淳臨安志一名盧橘有一種無核者名椒

子枇杷出嘉會門外於潛黃嶺前烏巾山小錫塘
塢出者尤珍白色者上黃次之

林檎 洪武蘇州府志今呼花紅此種出宋紹興間
接種禁中花開或貴戚大官折賜一枝後傳至中
吳凡園圃皆植之

楊梅 天中記楊梅塢在南山烟霞嶺近瑞峰石塢
內有金姆家甚盛俗稱楊梅塢咸淳臨安志十八
澗亦盛臯亭山產者尤甜

舊浙江通志有早色晚
色熏色數種東坡詩注

杭人呼白楊
梅為聖僧

棗

咸淳臨安志棗出鹽官者最著名然不甚大

萬歷

杭州府志核小味甜他處不及故名鹽官棗今俗呼羊冠棗又一種山東名楊桃出昌化縣

榧

杭州府志山縣多產富陽顏塢為佳以火煨食

甚香

木瓜

咸淳臨安志土產木瓜色青而小土人切作

片暴乾入藥都人以糖煎名燒木瓜

橘

元和郡縣志富陽縣王洲出橘為江東之最

仁和

縣志橘之美者皆接
生子種者不結實

蜜橘 朱彞尊駕鵞湖櫂歌注杭州塘棲市與石門
接壤產蜜橘粗皮而小無核味最甘

西瓜 咸淳臨安志西瓜有青白黃等色其類有金
皮沙皮蜜窰算筒等名土人尤稱周家青瓜皆不

若出謝村櫟林者酥白而大

西湖游覽志杭州月
塘皆沙田土宜瓜宋

有周姓者善種
之號周家瓜

荸薺 嘉靖仁和縣志近產獨山者佳

甘蔗 咸淳臨安志舊貢今仁和臨平多種之以土

窖藏至春夏可經年味不變小如蘆者曰荻蔗亦

甘

蓮 萬歷杭州府志紅花為上白花次之以江干鴻

雁池及西湖所產為最

郡城紀勝聚景園後湖中者名繡蓮極貴

藕 咸淳臨安志錢塘有西湖下湖者仁和有北新

橋北護安村產扁眼者最著名

萬歷錢塘縣志藕花白者香而結藕

菱 咸淳臨安志初生嫩者名沙角菱硬者名餛飩

菱湖中生如栗樣者極鮮秋末古蕩產大紅菱尤

甘脆

今北關外產者名
室頭菱最著名

芡 學圃雜疏芡實一名雞頭最補益獨杭州多而

佳

杭州府志今錢塘之良渚仁和之臨平湖所產
特佳西湖者尤勝然不多也可篩為粉周紫芝

芡實詩雞頭子熟客新嘗今日空懷名異
鄉紅線綠荷香夢裏十年燈火記錢塘

牡丹 牡丹榮辱志牡丹有錢塘花咸淳臨安志昌

化富陽者頗大杭城中吉祥寺東坡曾賞之又有

一種冬月開者和述古有詩

蘇軾吉祥寺賞牡丹
詩人老舊花不自羞

花應羞上老人頭醉歸扶路人應笑十里珠簾半
上鉤又和述古冬日牡丹詩一朵妖紅翠欲流春
光回照雪霜羞花工只欲呈新巧不放閒花得少
休花開時節雨連風却向霜餘染爛紅漏泄春光
私一物此心
未信出天工

芍藥 咸淳臨安志艮山門外范浦鎮多植此花冠
於諸邑有早緋玉白綴露又有千葉白尤貴

海棠 咸淳臨安志羅隱為錢塘令手植海棠於縣

署王元之有詩紀之

王禹偁錢塘縣羅江東手植
海棠詩江東遺蹟在錢塘手

杭庭花滿縣香若使當年
居顯位海棠今日是甘棠

紫陽花 咸淳臨安志禪宗院有山花一本色紫而香無人知名白樂天名為紫陽花有詩

辛夷 萬歷靈隱寺志唐時靈隱寺有此花鮮紅可

愛

白居易題靈隱寺紅辛夷花戲光上人詩紫粉筆含尖火燄紅臙脂染小蓮花芳情香思知多

少惱得山僧悔出家

桂 咸淳臨安志有紅黃白三色天竺多有之南部

新書杭州靈隱山多桂寺僧曰月中桂也至今中

秋夜往往子墜寺僧曾拾得

羣芳譜即今山桂天竺最多生子如蓮實

離離下垂天竺僧稱為月桂其花時常不絕枝頭
葉底依稀數點亦異種也湧幢小品紹定間舒岳
祥讀書館中中秋月色皎然聞瓦上聲如撒雷啟
門視之乃曰此月中桂子也嘗得之天台山中呼
童子拾得二升大如豫章子無皮色白如玉有紋
如雀卵其其中有仁嚼之作芝麻氣味費之雜菊花
作枕清芬襲人其叔拾不盡散落軌隙者旬日輒
出樹子葉柔長經冬猶秀僧道式桂子詩序天聖
辛卯八月十五夜月有濃華雲無纖翳天降靈實
其繁如雨其大如豆其圓如珠其色有白者黃者
黑者殼如芡實味辛識者曰此月中桂子播種林
下一種即活夢梁錄木犀有黃紅白色者甚香且
韻頌天竺山甚多天長橋慶樂園有數十株士夫
嘗往賞此奇香昔年高宗在德壽宮時賞桂嘗命
畫工畫為便面製詩分賜羣臣本草拾遺桂子大
於狸豆破之辛香相傳月中下也靈隱寺種得一

株北方無之山桂猶

可入華況月桂乎

謹按桂有金色銀色之分有早花晚花之別惟天竺月桂諸說載在舊籍者民亦往往見之他處則無豈山靈使之然耶別有一種花後結子累累又一種四季桂一年數花皆不常有

山茶 咸淳臨安志馬塍栽接有一本而十色者

蠟梅 咸淳臨安志萬松嶺上多有見東坡詩此花亦有數品以檀心磬口為佳

木芙蓉 咸淳臨安志蘇堤岸湖多種木芙蓉秋如霞錦今放生池尤盛

娑羅花 名勝志昌化千頃山生娑羅花初夏開時
其香遠聞

凌霄 全芳備祖錢塘西湖有詩僧清順居其上自
名藏春塢門前古松各有凌霄花絡其上子瞻過
之為作木蘭花詞

蘭 蘭譜杭蘭其花如建蘭香甚一枝一花葉稍闊
有紫花黃心色若臘脂有白花黃心白若羊脂甚
可愛用橫山黃土揀去石塊種之澆以羊鹿糞水

雞鵞毛水若澆灌得宜來歲花發其香勝新栽白

者名蓀出法華山

毛詩陸疏廣要江南人以蘭為香祖又云蘭無偶稱為第一香

蘭之種甚多如竹蘭石蘭伊蘭紫蘭鳳蘭尾蘭珍珠蘭玉柱蘭不可枚舉凡吳越皆有之

水仙 名勝志海寧縣錢山產水仙花

薔薇 咸淳臨安志園圃多用以編籬屏有寶象月

季等名

玫瑰 杭州府志杭人採花及腦麝作香囊虎林雜

記花販持盤唱賣以助閨檐晨粧

酴醾 咸淳臨安志有黃白二種白而心紫者尤香
瑞香 咸淳臨安志舊真覺院有此花今馬塍種最
多大者名錦薰籠

山礬 遵生八牋生杭之西山三月着花細小而繁
香馥甚遠俗名七里香

鳳仙 仁和縣志其色不一白者佳杭人浸酒飲之
能好顏色

真珠 咸淳臨安志土人名蘸水青條白蕊粲然可

愛

茉莉 消夏錄臨安六月士女汎湖多插茉莉

徘徊 咸淳臨安志此花極香苑中以雜腦麝為佩帶珠

菊 菊譜南宋臨安有長沙菊滿堂金壽安真珠孩

兒白金芳備祖花色極多臨安花市菊花時製為

花塔

楊萬里經和寧門外賣花市見菊詩老眼饒觀一束書客舍葶蔕菊一株看來看去兩相

厭花意蕭條恰似無清曉肩輿過花市陶家全圃移在此千株萬株都不看一枝兩枝誰復遺平地

拔起金浮屠瑞光千尺照碧虛乃是結成菊花塔
蜜蜂作僧僧作蝶菊花障子更玲瓏翡翠六扇排
屏風金錢裝面密如積金鈿滿地無人識先生一
見雙眼開故山三徑何獨懷君不見內前四時有
花賣和寧門裏花如海

觀音菊 百菊集譜天竺花是也五月開花頭細小

其色純紫枝葉如嫩柳幹之長與人等

白蘋 萬歷靈隱寺志生湖中色白香清

紅蓼 萬歷靈隱寺志生於湖濱俗呼水紅

或作水蓼

指甲花 草花譜生杭諸山中花小如蜜色而香甚

用山土移歸盆中亦可供玩

金鉢盂 靈隱寺志生湖中單瓣

金蓮 徑山志出寺中放生池移植他處即槁靈隱寺志生湖中重臺

堂花 癸辛雜識馬塍藝花如藝粟非時之品真足以侔造化凡花之早放者名曰堂花其法以紙飾密室鑿地作坎置花其上糞土以牛溲琉黃盡培養之法然後覓沸湯於坎中俟湯氣薰蒸則扇以

微風盎然盛春融淑之氣經宿則花放矣

按堂一作唐

木竹

筍譜靈隱山其筍可食今人採作杖可愛或

與籊同類

鶴膝竹

咸淳臨安志出靈隱山節密而內實略如

天壇藤間有突起者故名鶴膝

新婦竹

談薈出武林山其竹圓直韌可以作篴

譜筍

可為

篴筍

天親竹

談薈浙中有天親竹末皆兩歧

斑竹 萬厯靈隱寺志有斑文竹種自遠來峽川志
硤石東山有斑竹園竹幹最鉅而紋最深朗不減
湘妃禾人購以織簾作器具最工雅其在丹井下
坡者幹細而少紋矣

紫竹 大滌洞天記青梓山多紫竹嘉靖浙江通志
杭州紫竹宜為簫管

雙竹 筍譜今武林山西舊為雙竹院所產修篁時
對抽並節王子敬竹譜云錢塘扶竹蓋此雙竹即

扶竹也是竹為筍有合歡貌

碧玉間黃金 夢梁錄竹品有碧玉間黃金

文武竹 餘杭縣前志心實性堅又名雪竹文山出

者可作筆管武山出者可作箭桿

曲竹 紫桃軒雜綴洞霄宮生曲竹可為杖杭州府

志仁和縣安隱寺有曲竹可為杖

林次麟曲竹註直節稜稜是此

君耳孫却以曲為名首陽山下知難種只可斜封向管城

石竹 杭州府志勁利可削為刀

紺箸 大滌洞天記山周回百里多生紺箸葉大無
骨樵者往往臨爨得之有好事者攀緣幽討終年
不可得

筍籜 餘杭縣新志廣竹所脫者為花筍籜苦竹所
脫者為苦筍籜箭竹所脫者為青籜皆有利於物
用

茶 咸淳臨安志歲貢見舊志錢塘寶雲菴產者名
寶雲茶下天竺香林洞產者名香林茶上天竺白

雲峰產者名白雲茶錢塘縣志翁家山亦產茶最

下者法華山石人塢俱名本山茶

蘇軾僧怡然以新茶見餉報以

大龍團詩妙供來香積珍烹具大官揀芽分雀舌
賜茗出龍團曉日雲菴暖春風玉殿寒聊將試道
眼莫作兩般看

龍井茶 煮泉小品武林諸泉惟龍泓入品而茶亦

惟龍泓山為最其上為老龍泓寒碧倍之其地產

茶為南北山絕品

謹按杭郡諸茶總不及龍井之產而雨前細芽取其
一旗一槍尤為珍品第所產不多宜其矜貴也

天目茶 茶經杭州茶生臨安於潛二縣天目山者

與舒州同

煮泉小品天目固次品葉清臣云茂錢塘者以徑山稀今天目遠勝徑山而泉

亦天淵也洞霄次徑山

徑山茶 夢梁錄徑山採穀雨前茗用小缶貯之以

饋人

昌化茶 紫桃軒雜綴昌化所產大葉如桃枝柳梗

其味乃極香

酒 鶴林玉露頃在臨安太學同舍以思堂春合潤

州北府兵廚以慶遠堂合嚴州瀟灑泉飲之甚佳

余曰不剛不柔可以觀德

談薈宋南渡御庫有流香三省激賞庫有碧香

思春堂殿司有鳳泉祠祭有玉練埏京醞有雪醕真珠泉皇都春有美堂中和堂皇華堂榮邸有萬

象皆春秀邸有慶遠堂曲洧舊聞杭州酒名有竹葉清碧香白酒

花醞 晏公類要仙姥墩東晉初有裴氏姥居此採

衆花醞酒

薔薇露 老學菴筆記禁中供御酒名薔薇露賜大

臣酒謂之流香酒

梨花春 酒譜杭人趁梨花時釀酒名梨花春白樂

天詩青旗沽酒趁梨花

鹽 咸淳臨安志漢置鹽官吳王渚煮海為鹽之地

也

洎宅編元豐初盧秉提點刑獄會朝廷議鹽法東謂自錢塘縣楊村上流接睦歙等州水勢稍

澹以六分為額楊村下接仁和縣湯村為七分蓋取海水煉鹽所謂熬波者也湯村則刮醵以淋酒織竹為盤塗以石灰故色少黃竹勢不及鐵則黃色為嫩青白為上黑即多酒或有泥石不宜久停嘉祐雜志吳春卿遷臨安召舖戶詰驗鹽法云煮鹽用蓮子為候十蓮者官鹽也五蓮以下酒水漓私鹽也私鹽色紅自燒稻灰染其色以倣官鹽於是喚以辨之

茯苓 武林舊事小麥嶺無垢寺偃松下有茯苓因

名泉為茯苓泉

杭州府志
山縣俱產

麥門冬 舊浙江通志覓橋所產以肥大者為佳

益母草 咸淳臨安志生龍井山谷中最佳亦名草天

麻

於朮 萬歷杭州府志白朮以產於潛者佳稱於朮

清異錄潛山產善朮以其盤結
醜怪有獸之形因號為獅子朮

黃精 於潛縣志黃精為潛藥上品出天目

葉本 圖經本草杭州有之葉似白芷香又似芎藭
五月有白花七八月結子根紫色

黃皮木 名勝志雷峰塔產黃皮木咸淳臨安志生

於潛

菰莢 本草綱目浙人謂菰莢又名王瓜草根曰金
剛根

地龍藤 本草綱目生天目山樹繞蟠屈如龍故名
小天蓼 本草綱目天蓼生天目山四明山樹如梔

予冬月不凋能逐風而小者為勝

千金草 咸淳臨安志生仁和鹽橋

羊躑躅 夢梁錄根名天門冬生錢塘富陽

甘菊 萬厯杭州府志菊花有甘苦二種又野菊土人於立冬日多採以煎湯浴身又用之囊枕極清

目 今城牆產野菊香味清美及時採之勝於諸品

山石膏 嘉靖仁和縣志石膏山出石膏如雪

鹽硝 西溪叢語出縣東十里煉成樸硝又有冬月

自地中湧起硝通透光瑩者名霜花亦名劍脊硝
藥中用為元明粉紫雪之屬

寒水石 咸淳臨安志輕者寒水石硬者石膏生南

高峰塔下

礪石 嘉靖仁和縣志臨平山細礪洞出礪石

本草一名

越砥俗稱

羊肝石

石燕 昌化縣志雲谷山石燕洞其深莫測時見石

燕飛出

夢梁錄九邑山洞中皆有之

竹瀝 舊浙江通志竹品甚多惟淡竹苦竹三種煎瀝入藥良

赤萍 富陽縣志姥岑山上有沼赤萍生其中映水如濯錦

荻 西溪梵隱志渦水曰蕪葭深處秋深荻花如雪
茗 名勝志茗溪發源天目經餘杭達錢塘溪岸多茗花

菖蒲 蒙齋筆談錢塘郎簡築別館於徑山下即澗

傍種菖蒲數畝歲採取以自餌山人目之為菖蒲田

菰米 爾雅翼荻蔣草也生下澤者根既相結歲久則并土浮於水上土人謂之葑田刈去其葉便可耕植其苗有莖梗者謂之菰蔣至秋則為此米大抵葑是其根菰是其葉耳

夾麥青 四民月令清明時土人取以搗汁和粉為果餌食之

金星草 嘉靖仁和縣志金星洞在鳳凰山洞生金

星草

獨帚草 萬厯杭州府志一本可為一帚出山縣

虎鬚蒲 萬厯杭州府志杭人多植於盆以充玩好

苔 大滌洞天記丹泉之傍苔蘚常作紫暈

烟草 杭州府志一名萱莢本產於閩今土人多種

此為業

黃雀 餘杭縣新志麥黃時有細雀漫天而集名曰

黃雀土人以絲網罾之美逾常味

鶉鴒 四朝聞見錄東南之俗以養鶉鴒為樂羣數十百望之如錦灰褐色為下純黑為貴以粟食之既則繫金鈴於腰飛而颺空風力振鈴鏗如雲間之珮

山雞 名勝志海寧縣茗山多山雞

飛生 續博物志浙中有鳥名飛生狐首肉翅四足如獸飛而生子即隨母後人有難產以其爪安胸

腹間立驗

擣藥禽 大滌洞天記擣藥禽止有二伏藏深樹間
晝夜間鳴宛然搗藥聲

馬 咸淳臨安志昔錢氏牧馬於錢塘門外東西馬
塋其馬蕃息當時號馬海

謹按馬非杭產今會城有滿漢八旗駐防以及
鎮撫水陸各營皆牧馬水草得宜故馬亦蕃庶

麋 萬厯杭州府志似鹿而小皮甚細土人製以為

鞞

獺 萬厯錢塘縣志土人取獺皮為女帽名一盞燈
玉面狸 咸淳臨安志於潛昌化山谷有之

貓 咸淳臨安志都人畜貓有長毛白色者名曰獅
貓不捕鼠徒以飾觀

鰣魚 咸淳臨安志六和塔江邊生者極鮮腴舊浙
江通志四五月間富陽江中有之

石首魚 萬厯杭州府志一名黃魚產於海四五月
中杭人載冰出洋販至省城賣之

王右軍帖魚首
有石是野鳧所

化

窮魚 成化杭州府志其形似窮蓋比目之類俗書作鰕非時出惟富陽五月有之

鯽魚

杭州府志烏背紫鱗產西湖者尤鮮美

橫魚

餘杭縣前志四月從太湖逆水上大者百觔

石斑魚

嘉靖浙江通志生山澗中身有斑味鮮美

土鰲魚

成化杭州府志或作吐哺舊浙江通志土

步魚清明前者為佳

逆魚 餘杭縣前志產苕溪中長寸許懷子滿腹過

五月不復見

五色魚 名勝志吳山井有五色大魚數十時出游

泳人不敢取又玉泉寺方池清澈可鑑蓄五色魚

游泳如畫

金鯽魚 能改齋漫錄杭之西湖有金鯽魚投餅餌

則出然不妄食也蘇子美詩云松橋叩金鯽竟日

獨遲留東坡遊西湖詩云我識南屏金鯽魚重來

拊檻散齋餘皆紀其實

金銀魚 花史昌化縣千頃山上有龍潭產金銀魚

禱雨多應

金魚 程史今中都有秦魚者能變魚作金色以洿

渠之小紅蟲飼之初白如銀次漸黃久則金矣又

別有雪質而黑章的礫若漆曰玳瑁魚尤可觀惟

杭人能餌畜之

咸淳臨安志今錢塘門外多畜養人城貨賣名為魚兒活萬歷杭州

府志其異品者若梅花點鵲頂紅二色分之類名甚衆說者謂魚本傳沫而生即紅白二色因雌雄

相感而生花斑之魚以溪花郎與白魚相感而生
翠色之魚又取鰕與魚感則魚尾酷類於鰕有二

尾三
尾者

金色蛇

萬厯昌化縣志千頃山盤蛇石中有金色

小蛇人呼為聖蛇

蛙 四朝聞見錄杭人嗜田雞如炙即蛙也舊以其

能食害稼者故有禁久習此味人不能止售者剗

冬瓜以實之冥諸門謂之送冬瓜

侯鯖錄水雞蛙也水族中厥味

可薦若雞爾雅注云水雞
本草名坐魚其性好坐也

石蛤 成化杭州府志似田雞而大俗呼為錦襖子

生崖谷有水之處

蝦 咸淳臨安志湖生者殼青江產者色白

海寧縣志海蝦

白色邑人製之獨

善名曰酒發蝦

蝟蚌 咸淳臨安志產鹽官

即黃甲

蟹 咸淳臨安志西湖舊多葑田產蟹土人呼湖蟹

絕難得

蟹譜錢氏置魚戶蟹戶專掌捕魚蟹蟹畧潮蟹出江中

蚶蜆 輟耕錄海寧皆喜食蚶蜆螯名曰鸚哥嘴以

極紅者似之故也

武林紀事錢塘江邊有小蟹潛於沙穴中謂之彭月寒食人家

多醃食之又海邊出一種比彭月差大食之令人瀉痢又一種足生毛者名曰毛蜚尤不可食

蛭 咸淳臨安志產鹽官者絕大

海蛭 杭州府志螺屬杭俗立夏以為應時之味以

椒花灑之

無尾螺 永興寺志錢塘西溪永興寺前放生池產

無尾螺徑山志徑山下澗沼中螺俱無尾

蜂 萬曆靈隱寺志黑而大者名九里蜂

綾 咸淳臨安志白文公詩紅袖織綾誇柿蒂注云
杭州出柿蒂花者為佳內司有狗蹄綾尤光麗

羅 咸淳臨安志杭之羅有花素二種染絲織者名

熟絲羅尤貴

舊浙江通志杭
州出水緯羅

綢 咸淳臨安志有績線為之者用絲則熟而輕纖

謹按杭綢有一等最輕纖者用湖水漂淨宜於染色大紅尤佳以杭絲多錘鍊故也如帽纓一種亦較勝於他處絨絲等線亦然是否杭之專產志物亦宜備焉

錦 夢梁錄內司街坊所織錦以絨背為貴

剋絲 咸淳臨安志有花素二種擇絲織者故名

紵絲 咸淳臨安志染絲所織有織金閃褐間道等

類

綿綢 紫桃軒雜綴硤石人積梅雨水以二蠶繭繅

絲織綢有自然碧色名曰松陰色其法本宋寧宗

宮禁製號為天水碧

又紫薇山產綿綢
極精號紫薇綢

機紗 咸淳臨安志機坊所織有素紗天淨三法新

翻粟地紗

畫絹 咸淳臨安志機坊多織唐絹幅狹而機密畫家多用之

綿 夢梁錄以臨安於潛白而細密者佳

棉布 仁和縣志精曰棉粗曰絮凡鄉間皆為之多
出窳橋一帶萬歷杭州府志卉織為棉布出海寧
硤石者視他縣為佳

綦布 成化杭州府志有麻苧二品青白間花

藤紙 元和郡縣志餘杭縣由拳村出好藤紙咸淳

臨安志富陽有井紙赤亭山有赤亭紙

蠲紙 朝野類要宋時臨安有蠲紙者澤以漿粉謂之蠲紙

油紙 錢塘縣志錢塘出油紙

竹燒紙 餘杭縣新志出南建上高斜坑以竹浸之灰水中碓成紙祭祀焚以代帛

鼠鬚筆 萬歷杭州府志鼯鼯鼠俗名松鼠其鬚可為筆

墨 太平寰宇記昌化縣晚山山悉松木真墨所出
龍涎香 寶貨辨疑有伏古雲頭青燕三等其法傳

自南宋

能改齋漫錄有士人嘗客錢塘江漲橋後至河南友人寄以龍涎香有江漲橋邊花

發時之句答云記得吳家心字香

土檀香 上天竺山志乃樺樹根香極清遠

燈 舊浙江通志有紗絹紙及羊角等製

挂絲 雲麓漫鈔紹興中以小竹編聯籠以衣畫風
雲鷺鷥作枕屏一時無名號曰畫絲好事者大其

制施於酒席以障風野次便於圍坐人競為之今
名挂絲蓋以絲挂於竹骨之上也

扇 夢梁錄大街關撲有異色影花扇小市周家有

摺摺扇

春風堂隨筆今世所用摺扇亦名
聚頭扇南宋以來咏此者甚多

竹簟 仁和縣志桃枝竹皮滑而黃可為蓆

蚌珠 太平寰宇記錢塘縣明珠浦通浙江生蚌珠

金箔 萬厯錢塘縣志金箔銷金之尤者今民間首

飾器用多用塗畫歲糜不貲宋時曾禁轉鬻

錫箔

虎林雜記錫箔獨杭產城內造者不下萬家

鉛粉

嘉靖浙江通志出杭州

銀硃

嘉靖浙江通志出杭州

索籬沙

西溪叢語仁和縣出在縣東四里海際之

人採用鼓鑄銅錫之模諸州皆來採亦猶邢沙可

以碾玉也

漆

明一統志昌化縣出

柿漆

仁和縣志柿有一種名油柿浸得油名曰柿

漆用以油紙可隔水

柿漆杭人用以製扇名蜀府扇質粗耐久近人又以柿漆

漆紗頗

宜暑服

窯器

輟耕錄南渡後修內司造青器名內窯模範

極精為世所珍

浙甕

太平寰宇記錢塘縣亭市山餘石鄉村人悉

作大甕今謂之浙甕

假山石

宣和石譜杭州石出土中色多潔白扣之

無聲其質無峰巒勢偏多磊塊若桃李大尖銑或

硃砂牀有稜角望之光明精瑩頗宜裝綴假山

臨安石 宣和石譜臨安縣石出土中有兩種一深青一微青其質甚怪無尖峰高十數尺小者數尺溫潤而堅扣之有聲間有質樸從而斧鑿修治磨礪增巧頃歲錢塘千頃院有石一塊高數尺估值五百餘千置方斛中四面嵌空嶮怪洞穴委曲石罅間植一枇杷巖竇中嘗有露珠凝滴目為醜石政和間取歸內府此石之尤者

丹砂石 名勝志錢塘定山風水二洞中石子有紅點如丹砂持出即隱

瑪瑙石 西湖游覽志瑪瑙坡在孤山東碎石文瑩

若瑪瑙

謹按昌化縣產圖書石紅點若硃砂亦有青紫如玳瑁良可愛玩近則罕得矣

揩光石 輟耕錄製髹器用揩光石磨拭即雞肝石也出杭州上柏三橋埠牛頭嶺

青石 萬歷杭州府志錢塘南高峰產青石土人採

為金銀錫箔墩極光膩又用為搗衣砧及誌石碑

石之類

謹按省城離龍入首發脉九曜山實源於南高峰上映火曜鑿石常致火災是以官禁採鑿

白泥 餘杭縣前志出白泥山水澄過白如粉用以飾布春米又繪畫者以為粉地

石灰 萬厯杭州府志凡近山產石處皆燒造其多莫如錢塘上四鄉及富陽之盛

磚瓦 萬厯杭州府志仁和餘杭皆造

薪炭 臨安縣志臨邑地出薪炭結筏轉輸

蚊烟 萬歷杭州府志蚊土人以艾烟裹紙熏之輒

避


發燭 輟耕錄杭人削松木為小片薄如紙鎔硫黃
塗其頂名曰發燭又曰焠兒陶公呼為引光奴今
又易名火寸以焠寸聲相近也

湖上土宜 萬歷杭州府志起於宋時嬉游湖上者
競買泥孩鸚哥花湖船等物回家分送鄰里名之

曰湖上土宜

夢梁錄每歲七月七日貴宅及士夫皆出湖上買磨蝎藥又名磨睽羅孩

兒悉以土木雕塑更加綠裝闌座下以桌架之用
青綠銷金桌衣圍護或以金玉珠翠裝飾尤佳



浙江通志卷一百一